

Bil. 43

Rabu

5 Disember 2018



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

PARLIMEN KEEMPAT BELAS
PENGKAL PERTAMA
MESYUARAT KEDUA

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Kelewatan Penyempurnaan Pembinaan Bangunan Baharu Sekolah di Tapak Baharu SJKT Ladang Sungai Reyla**
- YB. Tuan Tuan Kesavan a/l Subramaniam (*Sungai Siput*) [Halaman 1]
- **Banjir di Kawasan Lanang**
- YB. Puan Alice Lau Kiong Yieng (*Lanang*) [Halaman 3]

**MALAYSIA
KAMAR KHAS
PARLIMEN KEEMPAT BELAS
PENGKAL PERTAMA
MESYUARAT KEDUA**

Rabu, 05 Disember 2018

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Kelewatan Penyempurnaan Pembinaan Bangunan Baharu
Sekolah di Tapak Baharu SJKT Ladang Sungai Reyla**

2.34 ptg.

Tuan Kesavan a/l Subramaniam [Sungai Siput]: Tuan Yang di-Pertua, selamat tengah hari. Yang Berhormat Timbalan Menteri Pendidikan, saya telah menerima satu aduan daripada Lembaga Pengelola Sekolah (LPS) yang telah memaklumkan kepada saya SJK(T) Ladang Sungai Reyla, berkenaan kelewatan penyempurnaan pembinaan baharu sekolah ini. Kerja pembinaan telah terhenti sejak 18 bulan yang lalu dalam keadaan kerja-kerja yang perlu dilaksanakan hanya sebanyak lima peratus sahaja.

Pada 3 Oktober 2018, saya telah melawat bangunan lama serta bangunan baharu di tapak baharu di Ladang Sungai Krudda. Keadaan bangunan lama amat membimbangkan dan membahayakan serta mengancam keselamatan murid-murid dan guru-guru serta ibu bapa. Manakala bangunan baharu yang terbiar begitu lama pula mengundang pelbagai kerosakan kerana ianya menjadi tempat penginapan burung-burung. Jadi saya mohon Yang Berhormat Timbalan Menteri Pendidikan dapat menjelaskan sebab-sebab kelewatan menyiapkan bangunan tersebut dan tindakan segera daripada kementerian untuk menyelesaikan masalah ini. Terima kasih.

2.35 ptg.

Timbalan Menteri Pendidikan [Puan Teo Nie Ching]: Terima kasih Tuan Yang di-Pertua, terima kasih Ahli Yang Berhormat. Kementerian Pendidikan Malaysia (KPM) ingin menjelaskan perkara-perkara yang dibangkitkan oleh Ahli Yang Berhormat Sungai Siput mengenai Kelewatan Penyempurnaan Pembinaan Bangunan Baharu Sekolah di Tapak Baharu SJK(T) Ladang Sungai Reyla.

Sebelum saya menyentuh tentang perkara-perkara yang dibangkitkan oleh Ahli Yang Berhormat, saya ingin memaklumkan bahawa SJK(T) Ladang Sungai Reyla merupakan sekolah bantuan kerajaan (SBK). SBK merupakan institusi pendidikan yang ditubuhkan oleh pihak lain yang menjadi pemilik kepada tapak atau bangunan sekolah serta menerima sumbangan bantuan modal dan sumbangan bantuan penuh daripada kerajaan yang merangkumi gaji guru dan kakitangan sekolah.

Pada peringkat awal projek pembinaan bangunan baharu SJK(T) Ladang Sungai Reyla mengalami masalah di dalam permohonan Kebenaran Merancang disebabkan lokasi tapak baharu sekolah terletak di luar kawasan pihak berkuasa Majlis Perbandaran Kuala Kangsar. Masalah tersebut telah berjaya diselesaikan, namun mengalami kelewatan. Akibat daripada kelewatan ini, kontraktor menghadapi masalah kekurangan modal pusingan. Kerja-kerja yang masih belum selesai ialah bekalan air dan penurapan jalan. Kontraktor juga menghadapi jumlah denda kelewatan yang tinggi.

Bertindak berdasarkan kontrak projek, pada 14 Ogos 2018, KPM telah mengeluarkan notis amaran kemungkiran kerja kontraktor nombor satu kepada kontraktor kerana gagal menyiapkan bangunan sekolah yang berkaitan. KPM mendapati pihak kontraktor tidak bersungguh-sungguh dan gagal menunjukkan prestasi kemajuan yang telah ditetapkan. Projek pembangunan sepatutnya telah mencapai 100 peratus siap tetapi kemajuan yang dicapai setakat 13 Ogos 2018 hanya 98 peratus. Walaupun baki kerja di tapak hanya tinggal dua peratus sahaja, namun projek ini telah mengalami kelewatan selama 698 hari dari tarikh yang ditetapkan.

Tuan Yang di-Pertua, sejajar dengan obligasi kontrak, pihak kontraktor telah diarah dan dikehendaki untuk mempertingkatkan dan mempercepatkan kerja di tapak agar projek ini dapat disiapkan segera. Pihak Kementerian Kewangan, berdasarkan surat kepada KPM bertarikh 20 September 2018, berpandangan bahawa isu ini hendaklah diuruskan berdasarkan syarat kontrak dan peraturan kerajaan dan dikemukakan kepada Jawatankuasa *contract coordination panel* (CCP). Oleh itu, KPM sedang meneliti dan menyelesaikan perkara ini berdasarkan peraturan Pekeliling Perbendaharaan IPPK/PK 4.4.

Pihak kontraktor telah mengemukakan permohonan lanjutan masa atau *extension of time* (EOT) yang terbaharu kepada KPM dan kini berada di dalam semakan. Pada masa yang sama, KPM dengan bantuan Kementerian Kewangan akan membantu kontraktor mengatasi masalah kekurangan pusingan modal yang sedang dihadapi melalui mekanisme yang dibenarkan di dalam pentadbiran projek dan juga Dokumen Kontrak. Walau bagaimanapun, merujuk kepada surat rasmi Konsultan Pengurusan Projek bertarikh 3 Oktober 2018, pihak kontraktor perlu mengemukakan semua dokumen sokongan bagi permohonan EOT dan menyiapkan semua kerja yang tertangguh di tapak. Di samping itu, pihak konsultan akan memohon pengecualian denda kelewatan ke pihak KPM untuk pertimbangan.

Kesimpulannya, projek pembinaan bangunan baharu di tapak baharu SJK(T) Ladang Sungai Reyla sedang dalam tindakan penyelesaian. Pihak KPM sentiasa berusaha dan bekerjasama dengan semua pihak untuk melaksanakan tanggungjawab bagi kelangsungan pendidikan anak-anak kita. Sekian, ribuan terima kasih.

■1440

Banjir di Kawasan Lanang

Puan Alice Lau Kiong Yieng [Lanang]: Terima kasih Tuan Yang di-Pertua. Tuan Yang di-Pertua, banjir kilat merupakan fenomena yang sering kali berlaku di Lanang, terutamanya di kawasan luar bandar. Sistem perparitan yang lemah menyebabkan laluan air permukaan akibat hujan lebat gagal mengalir ke kawasan yang sepatutnya lalu menyebabkan berlakunya banjir kilat.

Banjir kilat yang berpunca daripada parit yang cetek akibat mendapan sisa pepejal (sampah) atau tanah, sering berlaku di sesetengah kawasan Lanang seperti kawasan Jalan Tun Zaidi Ahmad Adruce, Jalan Pulau Dudong, Jalan Kong Yit Khim, Sentosa, Salim Belalang, Sengan, Menyan dan beberapa kawasan di Sibujaya iaitu kawasan Town Villa, Lorong 8 Sibujaya, serta kawasan Gereja Methodist Sibujaya. Keadaan ini telah menyebabkan jalan perhubungan di kawasan ini terputus kerana jalan yang turut ditenggelami air. Oleh itu, saya meminta agar pihak kementerian dapat membuat perancangan untuk menyelenggarakan serta membaik pulih semula semua sistem perparitan di kawasan-kawasan ini.

Selain itu, kedudukan rumah yang terletak berhampiran dengan sungai juga turut menjadi mangsa masalah banjir di Lanang seperti kawasan Naman, Ulu Sungai Menyan, Rumah Ampong dan Rumah Gelungan Sungai Nibong, Sungai Assan serta kawasan Latap. Banjir yang berlaku di kawasan ini telah menjejaskan keselamatan para penduduk kerana mereka terdedah secara terus kepada ancaman binatang buas yang mendiami di sungai

tersebut. Oleh itu, saya ingin bertanya sekiranya pihak kementerian mempunyai inisiatif ataupun perancangan jangka pendek dan jangka panjang yang mengatasi masalah banjir di kawasan-kawasan ini. Terima kasih.

2.42 ptg.

Timbalan Menteri Air, Tanah dan Sumber Asli [Tengku Zulpuri Shah bin Raja Puji]: Terima kasih Yang Berhormat Lanang. *Bismillahir Rahmanir Rahim, Assalamualaikum warahmatullahi wabarakatuh.* Tuan Yang di-Pertua, untuk makluman, kerja-kerja penyelenggaraan sistem perparitan di kawasan bandar bukan di bawah bidang kuasa Kementerian Air, Tanah dan Sumber Asli sebaliknya adalah di bawah bidang kuasa pihak berkuasa tempatan (PBT). Walau bagaimanapun, kementerian ini bersedia untuk bekerjasama dalam membantu PBT dan kerajaan negeri bagi menangani isu banjir kilat di kawasan bandar.

Kerja-kerja penyelenggaraan parit di Jalan Tun Ahmad Zaidi Adruce adalah di bawah seliaan Jabatan Kerja Raya (JKR). Manakala, bagi parit di Jalan Pulau Dudong, Jalan Kong Yit Khim, Kawasan Sengan, Kawasan Menyan, Kawasan Sibu Jaya (Town Villa, Lorong 8, Sibujaya dan Gereja Methodist) serta Kawasan Salim Belalang adalah di bawah selenggaraan Sibu *Rural District Council* (SRDC).

Bagi kawasan Sentosa, kawasan Naman, Ulu Sungai Menyan, Rumah Ampong, Rumah Gelongan Sungai Nibong, kawasan Sungai Assan dan Kawasan Latap, kejadian banjir tersebut adalah disebabkan oleh limpahan air sungai.

Perancangan jangka masa pendek perlu dilaksanakan adalah dengan melaksanakan kerja-kerja penyelenggaraan sungai/parit secara berkala bagi meningkatkan kapasiti sungai/parit terutamanya ketika musim hujan untuk mengurangkan risiko banjir.

Bagi perancangan jangka masa panjang, kajian pelan induk, sistem saliran di kawasan yang terlibat perlu dilaksanakan bagi mengenal pasti punca yang sebenar kejadian banjir dan kaedah yang berkesan untuk mengatasinya.

Selain itu, perancangan pembangunan bandar hendaklah dikawal oleh PBT dengan memastikan tiada peningkatan/pertambahan air larian permukaan ke saliran sedia ada akibat pembangunan yang dilaksanakan. Maksud di sini, pembangunan setempat mestilah seimbang dengan aliran air, tidak boleh sewenang-wenang untuk buat bangunan, saliran air itu kecil. Aktiviti kerja tanah untuk projek-projek pembinaan dan pertanian perlu juga dikawal bagi memastikan kelodak/enapan tidak memasuki sistem perparitan dan sungai. Terima kasih.

Timbalan Yang di-Pertua [Dato' Mohd Rashid Hasnon]: Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 06 Disember 2018.

[Kamar Khas ditangguhkan pada pukul 2.44 petang]